

Danskit ilinniarnermi siuariartornissaq pillugu nutarterinerat ilinniagaqartunut nunatsinneersunut Danmarkimi najugaqartunut danskit ilinniagaqarnermi tapiissutigisartagaannit pissarsisinnaatitaasunut sutigut aalajangersimasutigut qanoq kinguneqarsimaneranik misilittagaasimasut pillugit danskit naalagaaffianni pisortanut paasisassarsioqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut.

(Inuit Ataqtigiit Inatsisartunut ilaasortaataat)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeerinnineq

Siulliullugu oqaatigilara nuannermat takullugu tamatta ilinniartut ilinniarnerminnik pilertornerusumik naammassinnittarnissaanik kissaatigigipput.

Imaaratarsinnaavoq Danmarkimi kalaallit ilinniagaqartut danskinit ilinniaqatiminnit ”fremdriftreformimit”, tassa Danmarkimi ilinniartut qaffasinnerusuni naammassilertortarnissamik qitiutitsinermi eqqornerlugaanerussasut. Tamanna Naalakkersuisut soorunami eqqumaffigaat, taamaammallu ilinniartut pitsaanerpaamik qularnaariffiginarlugit suliniutinik assigiinngitsunik – oqaatsitigut kulturikkullu - aallartitsinikuuvugut.

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup Danmarkimi ilinniartitaanermut ministeria pilertornerusumik ilinniakkamik naammassinnittarnissamik siunertaqartumik suliniutaat, taassumalu Danmarkimi kalaallinut ilinniartunut kingunerisinnaasai pillugit attaveqarfigereersimavaa. Isumaqtigiissutigineqarpoq pisut malinnaavigineqassasut paasisutissallu tatiginartut pissarsiarineqarpata tamanna eqqartoqqinneqassasoq. Ilimagineqarporli tamakku aatsaat 2016-imi aasakkut pissarsiarineqarsinnaassasut.

Pissutsit immikkut ittut pissutigalugit immikkut akuerineqarsinnaanermut maannakkut malittarisassaqaareerpoq. Tamassumani pisariaqarpoq ilinniartut SU-p nittartagaa aqutigalugu tamassuminnga namminneq qinnuteqarnissaat. Immikkut akuersisoqassappat piffissaq qaammatinik aqqaneq marlunnik sivitsorneqarsinnaavoq.

Naammassinnittarneq pillugu aqqissusseqqinerup misissoqqinneqarnissaa Danmarkimi qineqqusaarnermut atatillugu amerlasuunit taperseerpoq. Immikkoortut suut allangortinneqartussatut kissaatigineqarnersut qularnaatsumik sulii ilisimaneqanngillat. Oqallinneq tamanna Naalakkersuisut soorunami malinnaavigilluinnarpaat.

Kisiannili Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup Kalaallit Illui pineqartoq pillugu upernaarli oqaloqatigereernikuuai, taakkulu naammassinnittarnermik aqqissuusseqqinnerup akuerineqarnerata kingorna kalaallit ilinniartut ilitersortarpaat. Tamanna naammassinnittarneq pillugu aqqissuusseqqinneq aammalu immikkut akuerineqarnissamut periarfissaareersut pillugit Naalakkersuisut upernaag allagaqarnermikkut nangeqqippat. Taanna Kalaallit Illuinut ilinniartunut tamanut ingerlatitseqqiisunut nassiunneqarpoq.

Naalakkersuisut aammattaaq ilinniartut Danmarkimi ilinniarnermik aallartitsinnginneranni ikiorneqarnissaannut periarfissat misissorpaat. Ilaatigut GUX-imi ilinniartitsissut kulturimut piareersarneq atorlugu taamaalioreerpugut. Naalakkersuisoqarfiup tamassuma saniatigut Danmarkimi højskolit suleqatigalugit inunnt Danmarkimi ilinniarnissamik kissaateqartunut naatsumik sukumiisumilli pikkorissartitsisarnissanut periarfissat misissorpai.

Immikkut ilinniagaqarnersiutinik tunisisarnissaq iluaqutaanaviangilaq ilinniarnermik naammassilertornissamik aqqissuusseqqinnermi ECTS-inik pissarsiarisimasat tunngaviummata – tamannalumi aamma siunnersuummi erseqqissarneqarpoq. Tamassuma malitsigissavaa ilinniagaqarnersiutinik immikkut ittunik tapiisoqarsinnaagaluarpalluunniit, ilinniartoq ukioq ataaseq sinnerlugu piffissamik qaangiisimasoq- immikkut ittumik ilinniartuunersiutinik qinnuteqareersimangippat akuerisaasimangippallu - ilinniarunnaartitaassammat.

Naalakkersuisut taamaalillutik naammassinnittarnermik aqqissuusseqqinnerup sunniutai pillugit danskit naalagaaffiat ingerlaavartumik maannakkut oqaloqatigisarpaat, tassungalu peqatigitillugu ilinniarnernik pitsaannerusumik sukkannerusumillu naammassinnittarnissaq pillugu ilinniartut ataasiakkaat piareersarnissaannut suliniutinik nammineerluta allartitsinikuulluta.

Taamaammat siunnersuutip akuerineqarnissaa Naalakkersuisut inassuteqaatigaat.